

# LA CARTA DEL APOSTOL SAN PABLO A LOS FILIPENSES

---

**Pablo tarō ji ucheē mbesa mondo Jesús quiato je**

**1** <sup>1</sup>Pablo chō se re. Timoteo rese. Jesucristo rimba chō ure re. A ureico ā mbesa jēje a. Felipeos jenda Jesucristo quiato ja je a. Jesús quiato rerecua je abe ureico ā mbesa a. Diáconos je abe no. <sup>2</sup>Sā Paba Ibatenda turā ndiqui jendese. Sā jembia mingo. Sā Jesucristo abe jembia mingo no.

**Pablo ñee Dios je Jesús quiato riñ**

<sup>3</sup>Sendua ndua mose jendese, seya beite aico jendese co. Gracias ae beite sequia Dios je jeniñ co. <sup>4</sup>Se ñee ñee mose Dios je jeniñ, seyate riqui co. <sup>5</sup>Se Jesucristo cheē nenei namo mosenda bei chō jēingo nguiā ndua bei serese co. Nyebe jēingo nguiā mbae mondo mundo bei seje co. Nyebe seya tuchi riqui nguiā jendese co. <sup>6</sup>Dios que ucheē mingue jeñiangui re, ae si ra siqui bei jendese jembitirō tirō. Jesucristo tu chee. Ae bei. Siqui bei ra jendese. Aicuate se quia co. <sup>7</sup>Coche aico nguiā ndua ndua eñ jendese cco. Achesecua tuchite quiatu nguiā jendese. Jē ngue jēingo beite quia serese ra. Jendua ndua beite que equia serese ra. Mbae mondo mundo bei seje. Mbia icuā icuā mose seje. Se mbia cheē ndiquisā quisā mose Jesús cheē si. Mbia setarō tarō mose. Ūquñ mose abe que jēingo beite serese ra. Dios turā ndese que nandeico mae mae mbeite ra. <sup>8</sup>Dios resa aico ñee co. Jesucristo rā si aico nyesequa tuchite jendese co. <sup>9</sup>Aico ñee mbeite Paba je jeniñ co. —Paba, ũquñ embuchesecua i i tuchi mbia ja rese. Ndeaquiato emondo i i tuchi ee, ae beite quia Paba je jeniñ co. <sup>10</sup>Eñ nda mbae turā jēicua. Eñ nda jēingo bei mbae turā ndese. Eñ nda Jesucristo ñee asiā jēje tu mose. <sup>11</sup>Eñ nda Jesucristo jemingo bei mbae turā ndese. Eñ nda mbae turā jēsañ sañ ja Dios je.

**Cristo mii nii ño aico nguiã se co, i Pablo**

<sup>12</sup>Ã tasenei jêje. Mbae icuã ngue jeĩ jeĩ mbeite quia seje, ùquĩ ngue Jesús cheẽ mbutiba eã mbei ra. Ûquĩ jeĩ jeĩ mose seje, mbia que jirandu tuchite quia Jesucristo rese cote ra. <sup>13</sup>A setarõ ji ñi cárcel a. —Cristo riĩ ño etarõ ji ñi nguiã hue, i jate mbia quia serĩ ùquĩ. Mbia rerecua chuchua jenda ja. Tuchuamo jenda ja abe. <sup>14</sup>Jesús quiato jirandu mose setarõ ji rese, esiquicheãte riqui Dios cheẽ nenei nenei ùquĩ cote. Jesús quiato ja riqui Dios cheẽ nenei nenei tuchi ùquĩ cote. —Dios riqui tuchi urerese co, i equia ùquĩ cote. Maende setarõ ji rese.

<sup>15</sup>Emo emo ndiqui Cristo renei ñooño ùquĩ. Ndua icuã icuã ño nguiã ùquĩ. Mae icuã icuã ño nguiã serese ùquĩ. Emo emo ndiqui Cristo renei turã tuchi ùquĩ no. <sup>16</sup>Ae Cristo senei ñooño nguia nae, ùquĩ icuãte riqui seje ã. —Sã Pablo tarõ ji ñiño, i equia serĩ ã. Cristo renei ñooño ã. Emo ndese ndua eã. Nyiese chõ eriqui nguiã ndua. <sup>17</sup>Ae Cristo senei turã nguia nae, ùquĩ ndua chõ nguiã emo ndese. —Jesucristo cheẽ nii ño Pablo tarõ ji ñi nguiã hue, i equia ndua serese ùquĩ. <sup>18</sup>Seyate emo Cristo renei turã mose. Seyate emo Cristo renei ñooño mose no. Cristo riĩ nguiatu eriqui nguia ñee. Tachĩmbia tuchi chõ nguia ùquĩ Cristo renei nenei mose.

<sup>19</sup>Jëndese abe seyate aico co. Ûquĩ jëingo ñee Dios je serĩ ùquĩ. Espiritu Turã ndiqui serese a no. Ae Jesucristo mbu seje. Nyebe Dios riqui nguiã setarõ ji reaquiato tuchi a. Nyebe seya tuchi riqui nguiã a. <sup>20</sup>Sesiquicheã tuchi ra se reae. Seireĩ ngũfã mbei nda eriqui Cristo cheẽ nenei nenei ña. Cristo bi achõ ndese taico bei setarõ ji. Mbia nda seiquia rei nguiã, se taico bei Cristo rese. Mbia nda sembusẽ ndei nguiã no, ùquĩ mose abe taico bei erese no. Eĩ ja chõ seje re. Eturã ja chõ seje no nde. <sup>21</sup>Cristo mii nii ño aico nguiã se co. Semano mose, eturã tuchi quiarei ùquĩ seje cote. <sup>22</sup>Dios semingobe mose, ae si je chõ aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. <sup>23</sup>Ma ño sebi jiri. Semano sete raque oso sacuã Cristo rese. Ûquĩ nda eturã jiri seje. <sup>24</sup>Se seicobe mose íbii, ùquĩ nda eturã jiri jêje reae. <sup>25</sup>Ûquĩ aicuate se. Seicobe mose, ùquĩ nda eturã jiri jêje reae. Nyebe ra Dios semingobe jiri jendese. Se Cristo icua uquia sacuã jêje. Se jembiaabe jiri sacuã Cristo rese. <sup>26</sup>Anyae ra oso jendea. Aque mose nda jëya tuchi Jesucristo rese chã.

<sup>27</sup>Ae uresenei senei nguia Cristo riĩ nae, ùquĩ andure chõ jëingo turã. Airandu turã nda se quia jendese chã. Eĩ nda mbia ñee seje chã. —Hue rĩ ja chõ eriqui ndua turã nye. Huee echĩ mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. <sup>28</sup>iTiri jenyechĩ nda Jesús ucuãyãsa si jê! Jësiquicheã mose, Dios ra ùquĩ mundua tata cuasu rese cote. “Huee ra

asochĩ nde”, i chee rae. “Jesús icuasa ra Dios mingo bei”, i ra ũquĩ jeni cote, jēsiquicheã mose esi. <sup>29</sup>Jē Cristo jēicuate quia ũquĩ cote. Ũquĩ miĩño eã. —Jeñimbirãcuã abe quiatu quia seriĩ, mbia icuã icuã mose jēje, i Cristo quia jēje co. <sup>30</sup>Sã mbia icuã icuãte riqui seje no. Eĩ si chõ mbia icuã icuã ndiqui nguiã jēje ũquĩ. Nande jaje bei chõ ñene. Jemae ndei que equia serese cose resē. Se mbia icuã ndiquisã quisã mose. Ũquĩ sí rese chõ jēingo nguiã jirandu randu serese namo no.

### Cristo seteã tuchi que tu ra

**2** <sup>1</sup>Jesucristo jembiu turãte quia co. Cristo nyesequa mose jendese, jēyate riqui ũquĩ. Espiritu Turã abe riqui jendese ũquĩ. Jendua turãte equia emo ndese ũquĩ. <sup>2</sup>Nyebe aico nguiã ñee jēje. Seyate aico raque jendese co. iSecheẽ jemumbayã tuchi quiatu quia jē! iSemia tuchi quiatu se jē! iJendua ata atachĩ nda jē! iHue rĩ ja chõ jēingo ndua jē! iHue rĩ ja chõ jēingo nyesequa nyiese no jē! <sup>3</sup>iAbei chiãte ra jēingochĩ jē! iJenguasu ra jēsãã saãchĩ! iJēseteã ño jēingo! —Nde chõchĩ ndeturã sesĩ, ijenye chõ jenyue! <sup>4</sup>“Se chõ jē” ijenyechĩ nda jē! Emo mbaerã abe rese quia nandeico ndua. <sup>5</sup>Sã Jesucristo riqui ndua eãte uchiese no. Erã si chõ nandeico ndua nande abe jē. <sup>6</sup>Dios rã si rei que Jesucristo ra. Ñimbuseteã tuchi que u íbii ra. Ererequa rã eã ngue eru íbii ra. —Dios rã si chõ taico bei se, iã ngue u íbii ra. <sup>7</sup>Mbia rerequa tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. <sup>8</sup>Mbia mo na ño ngue ae ra. Ibii eico mose cote. Mbia rerequa que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireĩte mano ira rese. <sup>9</sup>Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingo co cote. <sup>10</sup>Mbia ra ngoi ja chee ngũĩã ndese Jesucristo je ñee. Ae siqui ja íbii. Ae siqui ja ibátee no. Ae siqui ja ibiqui rĩ. Ũquĩ ja ra ñee turã Jesucristo je. <sup>11</sup>—Jesucristo rei mbia rerequa ja, i chee ra ũquĩ ja ñee. Ũquĩ mose ra Dios ia tuchi cote.

### Secheẽ jēisi chooño eẽ ño nguiã, i Pablo

<sup>12</sup>Secheẽ ngue jemumbayãte quia seico mose jendese. Ishote aico jēsi co. Secheẽ jemumbayã tuchi quiatu quia isho seico mose abe. Cochee jiri quiatu jēingo Dios je. Jēingo bei tuchi quia erese. Jenderao chee ra ibate mbae icuã si. <sup>13</sup>Dios quirãcuã ndiqui jeñiangui re ũquĩ. Dios quia mbae turã nyosei uquia nguiã jēje. Dios miĩ ño jemingo nguiã ubi rese.

<sup>14</sup>Mbae turã jēsãã turã ja chõ. Ñee icuã icuã ndocoĩ. Teã teã ndocoĩ. <sup>15</sup>Eĩ nda mbia mo ñee icuã icuã eã jēje. Eĩ nda jēicuã eã emo je. Dios ririĩ ño jē nde. Sã nyasitata riqui mbae resae jate itondáruu no. Eĩ ño jē nde. Nyasitata rã si chõ jē nde. Mbia icuã ndesae ja. <sup>16</sup>Jēingo mbia

mingo beisa renei nenei tuchi mbia je ũquĩ. Nyebe ra seya tuchi jendese Cristo tu mose. Secheẽ jẽisi chooño eã ño nguiã. Jaembaaquiatu chooño eã ngue Cristo riĩ nda. <sup>17</sup>Secheẽ nguire jẽingo Dios icuate ũquĩ cote. Secheẽ nguire jendete jemee tuchi mose Dios je, seya tuchite ra jendese cote. Mbia nda seiquia rei nguiã Jesucristo riĩ, seya bei ra aico jendese, jendete jemee tuchi mose Dios je. <sup>18</sup>Jeñimbia chõ nguia serese. Sã seyate aico co no.

### Timoteo tamondo jėje Epafrodito rese, i Pablo

<sup>19</sup>Jesús eno i mose, Timoteo tamondo rã jendea. Eĩ nda seya jirandu mose jendese. <sup>20</sup>Timoteo rã si áte emo ndua tuchi jendese. <sup>21</sup>Umbaerã achõ ndese chõ eataque riqui nguiã ndua ndua. —Á tasaã saã mbei Jesucristo je, i áte equia ũquĩ. <sup>22</sup>Sã eriirĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquĩ jẽicuate quia ũquĩ. <sup>23</sup>Nyebe ra Timoteo amondo jendea. Á tatea rã nyii. Mbia ra setarõ ji mii mbei a reae. Sembusẽ nda re no ae. Ũquĩ tatea rã nyii. Ũquĩ ndeare ra Timoteo amondo jendea. <sup>24</sup>Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

<sup>25</sup>Epafrodito abe tamondobe jėje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co. <sup>26</sup>Mae sete equia jendese co cote. — Mbia jiranduchĩ serasi rese re, i equia jeniĩ co. Nyebe eya eã ndiqui nguiã nduate jendese cote. <sup>27</sup>Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. <sup>28</sup>Nyebe Epafrodito amondo nguiã jėje aque. Jembia sacua erasiã ndese cote. Seya eã nda sasẽ jiri jemaie mose erese cote. <sup>29</sup>Nanderesenda tuchi chõ ae Jesucristo rese re. Ngasẽ mose pee, jëya chõ erese. Jẽisi turã ño. Eraanguia rese jẽingo turã mbei Jesús quiato. <sup>30</sup>Jesucristo riĩ ngue mano serĩ serĩte ra. Jesucristo cheẽ nenei nenei mose. Siquiche áte que equia ra. —Amanochĩ nda se re, i áte que equia ra. Sereaquiatu turã tuchi que equia ra. Ishote quiatu ngue jẽingo nguiã jẽ. Sereaquiatu aronea.

### Cristo mii ndese aico cote, i Pablo

**3** <sup>1</sup>Jëya bei chõ jẽingo Jesucristo rese jẽ! Ae asenei senei nguia jėje nyii nae, ũquĩ sí tasenei senei jėje. Sebite secheẽ nenei nenei sí jėje. Jendua bei sacua erese.

<sup>2</sup>Ae siqui nyacua raãte nae, ũquĩ si jenyiicuasẽ ño nguia. Eicuãte riqui ũquĩ. Aba rete sia chooño ño ũquĩ nde. Mbia mbaaquiatu turã ndocoĩ.

<sup>3</sup>Circuncisión ño nande re. Nandechiangui re chõ nandeico nguiã Dios

rerequia nande ã. Nande chõ nandeya riqui nguiã Jesucristo rese ã. — Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ùquĩ. Nandequiato jiriã tuchi chõ ùquĩ nde. <sup>4</sup>—Dios ra semingo bei, mbae turã naa naa mose, ae rei que se quia nyii ra. —Seturã nii nda Dios semingo bei, i chõchĩ emo. Seturã tuchi raque eriqui ùquĩ si. <sup>5</sup>Sechacuquia mose, ocho dñas mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbesa que amumbayã nguia ra. <sup>6</sup>Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia seriĩ nda. <sup>7</sup>Ùquĩ nii ngue aico secuasú raã naa tuchi cose ra. Jesús icuayã mose se. Mbae eã tuchi chõ ùquĩ seje cote re. Cristo rese quiatu aico nguiã co cote. <sup>8</sup>Mbae mo ndese aico queteã eãte co cote. Aico ndua eãte mbae mo ndese co cote. Jesucristo miĩ aicuate quia co cote. Ùquĩ eturãte mbae ja si seje cote. Jesucristo riĩ aico hui jate mbae si co cote. Iti rã ño mbae ja riqui nguiã seje cote. Seico bei sacuã Cristo rese. <sup>9</sup>Cristo rese tuchi chõ aico nguiã co cote. Aico bei rei que Moisés chimbesa rui nyii ra. Ùquĩ nii eã ño Dios seisi turã nguiã. Se Jesucristo icua mose, ùquĩ mose quiatu ngue Dios seisi turã nguiã. Ae Jesucristo icua quia nae, ùquĩ Dios isi turã ño nguiã. <sup>10</sup>Cristo aicuase tuchichĩ nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeicuã ndiquicharõ no. Eĩ ae rã nda mano mbae icuã si chã. <sup>11</sup>Eĩ mose ra Dios seraaque mbuquera si mingó bei cote.

### **Cristo miĩ ndese aico ndua co cote, i Pablo**

<sup>12</sup>Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacuã ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacuã tuchi chee ae rã si cote. <sup>13</sup>Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ùquĩ miĩ ndese chõ aico nguiã ndua co cote. <sup>14</sup>Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguiã erese co. Premio isi sacuã. <sup>15</sup>¡Eĩ nande ja tuchi quiatu quia siqui Jesucristo rese jê! Nande eicua tuchi mose. Jendua ja eã mose hue rĩ, Dios ra ñee jêje. —Ã ndese chõ jêingo, i ra jêje. <sup>16</sup>Ae nandesiiti nae, ùquĩ ndese bei chõ nandeico. Ae riĩ Dios nandembaaquiatu quiatu nyii nae, ùquĩ ndese bei chõ nandeico. <sup>17</sup>Serui bei jêingo, Seresenda. Ureico bei Jesucristo rui ã. Sã mbia siqui bei urerui. <sup>18</sup>Mbia tubiriã ndiqui Cristo ucuãyãte ã. Ùquĩ ae rei que se quia jêje nyii resẽ. Aba mbucheseo seriĩ. “Cristo

que mano mbia riquicharõ nda”, ùquĩ andu sereãte. <sup>19</sup> Ûquĩ nda nyoi ja tata cuásuu. Ubi rese achõ ño ùquĩ ndiqui nguiã. Eireĩ nguiãte. Eya chõ eriquichĩ nguiã huiicuã ndese. Ibi jenda achõ ndese chõ eriquichĩ nguiã ndua. <sup>20</sup> Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. ã nandeico eraarõ arõ ã namo. <sup>21</sup> Jesucristo tu mose nande je íbii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

### Jëya bei chõ jëingo Cristo rese

**4** <sup>1</sup> Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. iJëingo turã tuchi chõ Jesucristo rese jê! <sup>2</sup> Evodia je tacheẽ. Síntique abe je tacheẽ. ¿Mbaerã jëingo siqui icuãte nyue re? Jëingo turã ño jenyue ae. Jesús quiato chõ jê ndesẽ. <sup>3</sup> Nde abe je tacheẽ, Seresenda. Ûquĩ cuña emingo turã nyiese. Eteaquiato bei quia. Ûquĩ ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que ùquĩ mbae nombre miĩ miĩ libro umbae rese ra. — Ûquĩ nda siqui bei serese, i que ra. <sup>4</sup> Jeñimbia bei Jesucristo rese. iJeñimbia tuchi jê! <sup>5</sup> Sã mbia mae ja jêturã ndese. Jê abei rese. Achite Jesucristo ñi tu a. <sup>6</sup> Pari pari jenyechĩ nda mbae mo je. Jeñee ja quiato Dios je. — Mbae mo embu ure je, jenyẽ chõ nguia ee. Gracias jenyẽ chõ nguia ee. <sup>7</sup> Ûquĩ mose ra Dios jembia tuchi. — Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingo no.

### Mbae turã ndese chõ jëingo ndua

<sup>8</sup> Hui bei nonde ã abe tambesa jêje. iMbae icuã ndese ra jenduachĩ jê! Mbae turã ndese chõ jëingo ndua. Ae riĩ nandeico ñee turãte, ùquĩ ndese chõ jëingo ndua. Ichõiñosa reã ndese chõ jëingo ndua. Ae Dios bite nae, ùquĩ ndese chõ jëingo ndua. Mbae quishĩ ndese chõ jëingo ndua. Ae rese mbia turã ndiqui mae sete, ùquĩ ndese chõ jëingo ndua. <sup>9</sup> Ae asenei senei nguia jêje nyii, ùquĩ ndese chõ jëingo jê. Ae eraã ndese jëingo mae mae seje nae, ùquĩ ño jësãã saã mbei quia. Ûquĩ naa naa mose, Dios ra siquijendese. Jembia bei ra equia.

### Jesús quiato ofrendas mondo Pablo je

<sup>10</sup> Jendua ramombe equia serese ùquĩ. Dios sembia tuchite quia ùquĩ ndese co. Jêtesarei eãte rei que equia sesi nyii ra. Mbae que jemondo aroneate quia seje nyii ra. <sup>11</sup> — Mbae ãte seje. Mbae mo embu seje, ae ãte se quia jêje co. Sembãe eã mose, seyate ùquĩ mose. Sembãe ñetẽ mose,

seyate ũquĩ mose no. Ũquĩ je que achimbaaquiatu se ra. <sup>12</sup>Sembae eã mose, seyate ũquĩ mose se. Sembae tubiriã mose, seyate ũquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. <sup>13</sup>Cristo que uquirãcuã mee seje ra. Equirãcuã je mbae asaã ja arondete. <sup>14</sup>Coche ngue mbae jemondo nguiã seje. Sembae eã mose. Seyate raque sembae eã mose. <sup>15</sup>Jẽ ae chõ ngue mbae jemondo mondo bei nguiã seje. Se Jesús cheẽ nenei namo mose bei chõ ngue mbae jemondo mondo nguiã seje. Iglesia mo abe que mbae mee ãte seje ra. Jẽ ae chõ ngue re. Filipos jenda ja. Se Jesús cheẽ nenei nenei namo mose jẽje, aque mose bei chõ ngue mbae jemondo mondo seje. Seso ramo mose Macedonia si. <sup>16</sup>Sã ñi mbae mo jemondo mondo seje Tesalónica seico mose no. Mbae eã mose seje. <sup>17</sup>—Mbae mo jemondocho seje, ae ãte quia jẽje a. Dios je chõ jẽingo nguiã emondo ũquĩ. Dios ra mbae mondo tuchi jẽje eribishorõ. Ũquĩ ndese quiatu seya riqui nguiã. <sup>18</sup>Ae jemondo seje namo Epafrodito rese nae, ũquĩ ngue aisi ja ra. Dios bite jeñimondo. Ofrenda turã tuchi que ũquĩ Dios je ra. Mbaete rei sembae cote re. <sup>19</sup>Jesucristo resenda chõ jẽ nde. Ae emoate jẽje nae, ũquĩ nda Dios mee ja jẽje. Dios quia mbae quereco ja nguiã. Equirãcuãte quia ñene. <sup>20</sup>Sã mbia ñee turã mbei Dios riĩ. Nanderu riĩ. Amén.

#### Hui bei chõ ã cote re

<sup>21</sup>Jesucristo quiato je saludar jenye ja seje. Ae Jesús quiato riqui serese nae, ũquĩ ucheẽ mondo quia saludar i jẽje aque. <sup>22</sup>Jesús quiato a jenda ja ucheẽ mondo quia saludar i jẽje aque. César chuchua jenda abe ucheẽ mondo quia jẽje aque. Ae siqui quia Jesús rese, ũquĩ. <sup>23</sup>Sã Jesucristo turã tuchi riqui jẽ ja je. Amén.